

BOGHE 'E MUNTAGNA

Cando s'aumbrat s'aera in su sero
 e chi morit sa die a pagu a pagu,
 cuminzan sas istellas a ricamare
 trapuntas luminosas in su chelu;
 e cando a risu in bucca s'astru 'e prata
 s'affazzat a sa terra
 ammantendela 'e lughe fritta e groga,
 est tando s'ora chi su sonnu invitu
 s'abbrazzat cun s'olvidu
 pro tessere umpare, a cuncordu,
 una tela 'e neula giagada
 cun filu fattu 'e sola illusione.

Ma 'eo, a su reversu,
 revudo forte custu banzigare
 in pasidos momentos de reposu
 ca sos sustos s'arrean a un'ala
 pro fagher logu a mannos oriolos
 chi mi pesan in conca che contones.
 Penso a custa cara isula mia,
 logu 'e mare selestru e ladinu,
 de domos de janas, de nuraghes,
 de cantos, de usanzias antigas,
 de chessa, de lidone e de mudegiu
 chi est ferida in s'anima e in su coro.
 'Ogn'annu de sos donos naturales
 benit minimada che cundanna,
 e in sa 'este sua vegetale
 unu lentolu 'e morte b'han'istesu
 lassende in su piantu disperadu
 e pellegrinas tantas criaduras!

Ma, dae sa punta 'e su Gennargentu
 calat una 'oghe manna e furibunda
 pro iscutinare totta sa Sardigna
 chi narat: " inue sunu sos sentidos
 o zente chi restades in su logu?
 Non siades feras, barbaros, arestes!...
 Chircades semper solu 'e alimentare
 sa fiamma 'e su mezeru e de s'amore
 e non cudda chi a fundu devorat
 'ogni lughe de vida e de ispera".

Su frusciu.

MARIO PORTAS

TERGU